



欽定四庫全書

110
130
72

子部
禱家類存目六七八

12
130
72

七十三



115
1330
72

學東

欽定四庫全書總目卷一百二十九

新錢支
有物那

子部三十九

雜家類存目六

蔣說二卷

兩淮鹽政
採進本

國朝蔣超撰超有峩眉山志已著錄蔣說者蓋因其
姓以名書如僧肇著書名曰肇論之類也而觀其
自序乃轉讀菰蔣之蔣已為詭僻其書雜記聞見
別類分門附以議論大旨明鬼而尚儉尤尊佛氏
至以儒童菩薩化生孔子為實然其論時政三十

欽定四庫全書總目卷一百二十九 子部 雜家類存目六

一

餘條欲復封建一說九迂謬難行惟卷末記節烈數十條或可備志乘採擇耳

雲谷臥餘二十卷續八卷

浙江巡撫採進本

國朝張習孔撰習孔字念難歙縣人順治己丑進士官至山東提學僉事其書喜議論而不甚考證多以私臆斷古人又果於自信如杜甫之詩皆為改定左丘明之傳亦為刪削此自有詩文以來無人敢為之事也

蒿菴閒話二卷

桂林府同知李文藻刊本

國朝張爾岐撰爾岐有周易說略已著錄是編乃其劄記之文凡二百九十六條顧炎武與汪琬書自稱精於三禮卓然經師不及爾岐故原跋以是編為日知錄之亞然日知錄元元本本一事務窮其始末一字務核其異同是編特偶有所得隨文生義本無意於著書謂之零璣碎璧則可至於網羅四部鎔鑄羣言則實非日知錄之比如曾子易簣一條稱嘗見一書說楚國會聘曾子為相是當時亦曾作大夫故季孫得以此為遺云云案韓詩外

傳稱曾子仕於莒得粟三秉方是之時曾子重其
祿而輕其身親沒之後齊迎以相楚迎以令尹晉
迎以上卿方是之時曾子重其身而輕其祿又稱
曾子仕齊爲吏後南遊於楚得尊官爾岐所謂嘗
見一書當卽指此然韓嬰採掇雜說前後已自相
違異豈可引以詁經顧炎武必無是語矣其論吳
澄三禮考註出於依託極爲精核蓋爾岐本長於
禮故剖析鑿鑿使盡如斯則方駕日知錄可也

暑窻臆說二卷

山東巡撫
採進本

國朝王鉞撰鉞有粵遊日記已著錄是編則世德堂
遺書之第四種也前有自序稱三伏酷暑揮汗之
餘取架上書得明人小說百餘種逡巡讀之隨讀
隨筆今核其名目似所讀乃陶珽續說郭也如辨
莘野纂聞記劉球事涉異編勦太平廣記所載慕
容垂詩春風堂隨筆誤記元韶娶魏孝武后事之
類亦閒有可採而體例不善賓主混淆不辨孰爲
原文孰爲鉞語是則排纂之過耳

聽潮居存業十卷

江西巡撫
採進本

國朝原良撰良字鳴喜江西樂安人順治中貢生官甯都縣訓導是書分十編各立四字標目一曰明宗正學前多講學之語後亦雜論經義如謂孔子學問源於契及成湯武丁謂刪詩存車鄰爲預知秦有趙高之禍皆失之附會二曰身世要則多論世故如陰德一條既云陰德非惟不求人知亦不可求天知報應緩急一條又稱天不急性却有記性吾輩於善念善事須忍耐爲之隔半頁而自相矛盾附以讀書作文十六則亦殊不倫三曰史會

大綱四曰友古特評五曰羣古對觀六曰左國補議皆史論也但大綱多論世運盛衰特評則品藻人物對觀則摭古之相類者論之補議則仿呂祖謙左氏博議柳宗元非國語而斟酌其說耳七曰讀餘志略大致如王世貞讀書後而彌爲膚淺如以考工記爲三代以上之書不宜附之於周是併鄭之削宋之斤吳越之劍諸句亦未讀也八曰元圃餘珍剽掇舊事略加評斷亦史論之旁支九曰韻林隨筆皆所作詩話如謂庾信詩爲梁之特出

唐之先鞭而文選少載又謂劉禹錫元稹白居易
與宗楚客同賦金陵懷古詩則其他可以槩見矣
十曰山野寤言皆私撰經世之策尤多迂闊之談
大抵好爲議論而所學則未能淹貫者也

匡林二卷

浙江汪汝
璞家藏本

國朝毛先舒撰先舒有聲韻叢說已著錄是編皆其
議論之文哀爲一集自序稱讀蘇軾志林稽諸事
理時或戾焉因偶爲駁正數段更取他作之類似
者併錄之得若干篇名曰匡林則是書立名當爲

匡正志林之義而與軾辨者僅二三條其餘皆自
錄集中雜文與近人辨者然則以哀聚眾作謂之
林以力排俗論謂之匡觀其小匡文鈔序以小有
所匡爲說可互證也先舒嘗與毛奇齡書戒其詆
訶太甚故持論不似奇齡之獷然習尙實似奇齡
但奇齡喜談經先舒喜談史奇齡好蔓引典籍先
舒好推究事理奇齡好與古人爭先舒好與今人
爭耳其中如謂春秋不書隱公卽位所以誅平王
鄭伯克段之事罪在段不在鄭伯齊桓首止之盟

定王世子爲大惡皆故爲高論牽引夢與九齡之
文以駁艾南英亦頗附會使盡如其題杜詩註之
類則善矣

庸言錄

無卷數 浙江
吳玉墀家藏本

國朝姚際恆撰際恆字善夫徽州人是編乃其隨筆
劄記或立標題或不立標題蓋猶草創未竟之本
際恆生於

國朝初多從諸耆宿游故往往剽其緒論其說經也
如關圖書之僞則本之黃宗羲闢古文尙書之僞
則本之間若璩闢周禮之僞則本之萬斯同論小
學之爲書數則本之毛奇齡而持論彌加恣肆至
祖歐陽修趙汝楨之說以周易十翼爲僞書則尤
橫矣其論學也謂周張程朱皆出於禪亦本同時
顏元之論至謂程朱之學不息孔孟之道不著則
益悍矣他如詆楊漣左光斗爲深文居功則三朝
要典之說也謂曾銑爲無故啟邊釁則嚴嵩之說
也謂明世宗當考輿獻則張桂之說也亦可謂好
爲異論者矣

筠廊偶筆二卷二筆二卷內府藏本

國朝宋犖撰犖有滄浪小志已著錄是書皆雜記耳目見聞之事其中如回鴈峰考之類亦閒資考證然如風風雨雨送春歸一詩向謂乃無名道士詩此獨載為鬼詩劉廷璣在園雜志又考校字句辨其是非實則明人所刊醒世恆言傳奇中詩不知何以譌傳至是也亦足徵小說之不足憑矣

二樓紀略四卷浙江巡撫採進本

國朝佟賦偉撰賦偉字青士襄平人官甯國府知府

甯國舊有北樓即南齊謝朓之高齋明嘉靖中即府朱大器又起文昌臺設書院其下賦偉更為修治題曰南樓每乘暇遊宴其間因雜錄見聞為此書多自述其政績及旁涉他事不盡有關於二樓既非地志又非說部九流之內無類可歸姑附之

雜家類焉

介軒遺筆二卷江西巡撫採進本

國朝史既濟撰既濟字若川鄱陽人是編皆隨筆記錄多誌其家世本末及江右近事閒及經史亦罕

所考據發明

復堂雜說一卷

江西巡撫採進本

國朝史白撰白字堅又鄱陽人書中皆雜論經史之語其解易卦多尙互體頗能復古其餘皆習見之語首尾僅四十餘則蓋其隨筆劄記而後人鈔撮成帙者也

竹村雜記二卷

江西巡撫採進本

國朝史白撰亦復堂雜說之類而條目稍多其中謂左傳國語非一人所作引黃池之會左氏作先晉

人國語作吳公先歆為證頗能得閒解壹發五犯以中必疊雙為誤解朝賸于西以朱註作兩止為誤亦頗見疏剔至謂桎梏而死為桎梏於人欲則殊失之穿鑿其他亦不能一一精確也

山志六卷

江蘇周厚堦家藏本

國朝王宏撰撰宏撰有周易筮述已著錄是編乃其筆記之文議論多而考證少亦頗及見聞雜事其論曾子字子輿孟子受業子思之門人不應亦字子輿不知古不諱字即弟子亦不避師名董仲舒

弟子有呂步舒漢人最重師承當時不以爲非也其論古詩東城高且長與燕趙多佳人當從文選註分爲二篇不知李善五臣竝無此語此語起於明張鳳翼之纂註不足爲據陸機所擬及徐陵玉臺新詠亦均作一首鳳翼何從知爲二也其載明世宗論書武成篇有引用歐陽修語指爲有功於六經揚一清對以修之解經僅見武成宏撰以一清之對爲是是均未知修自有詩本義也其載郭正域所刻韻經爲沈約故本詆屠隆未見其書是

韻書原委全未尋檢也其載簡紹芳之說辨揚雄未嘗仕王莽是未核李善文選註王儉集序所引劉歆七略也其爲楊嗣昌辨冤亦恩怨之見不足爲憑至於紀孫傳庭之死謂得於其至戚孔滌儒與史小異可資參考其講學諸條亦皆醇正平允與孫承澤雖友善而無所曲徇頗能去門戶之見爲可取云

尚論持平二卷析疑待正二卷事文標異一卷

浙江吳玉墀家

藏本

國朝陸次雲撰次雲有八紘譯史已著錄三書皆辨
證經史疑義體例相同特隨得一二卷卽以付梓
遂各立名目實則一書而再續耳尙論持平上卷
論五經下卷論四書及子史多摭拾瑣說而參以
臆斷如水流溼火就燥溼自爲卑溼燥自爲乾燥
而取秦觀之說謂溼者土之氣土者水之妻夫從
妻好故水流溼燥者金之氣火者金之夫妻從夫
令故火就燥殊穿鑿無理謂周南召南卽舜歌之
南風謂詩以邶鄘衛竝列存三監也存三監所以

存殷也殷祀之絕有未愜於聖人之心者謂夫子
錄秦風寺人之令爲預見趙高之禍謂秦誓武成
皆稱紂爲商證殷爲地名非國號皆杜撰無稽至
春秋未嘗擯楚論語不語怪力亂神爲指春秋皆
郝敬之謬談孟子論貴戚之卿爲陰指田文之將
篡乃于慎行之妄說管蔡爲殷之忠臣文王之孝
子尤郭子章之悖語一槩錄之殊失裁斷謂尙書
逸篇乃逸於孔子之時不逸於秦火之後謂忠經
真出馬融其註真出鄭元更漫無考證矣析疑待

正於豳風七月孟子十一月徒杠成十二月輿梁成皆力主周用夏正與尙論持平中春王正月一條自相矛盾其推崇偽撰三墳爲古書蓋陰勦鄭樵之說而諱其所出癸辛雜識辨詩序后妃之德句謂后指文王妃指太妣以是例之則葛覃序稱后妃所作將文王與太妣聯句乎螽斯序稱后妃不妒忌將以不妒忌加文王乎其說至爲無理而次雲取之殊不可解事文標異稱黃帝素問引古月令案素問無引月令之文其註中所言乃宋

林億等校正引唐月令與黃帝無關又稱大學石經本案石經出自豐坊其政和年號之舛迕合兩賈逵爲一人之謬誤前人已辨之尤侗良齋雜說不暇致詳次雲又述之亦爲失考惟其稱緇衣所載葉公之願命註家以爲沈諸梁者其文實在汲冢周書祭公解內葉字爲祭字之譌其言有據可以備一解耳

在園雜志四卷

浙江巡撫探進本

國朝劉廷璣撰廷璣字玉衡號在園鑲紅旗漢軍由

廕生官至江西按察使後降補分巡淮徐道是編
雜記見聞亦閒有考證頗好譽已詩似張表臣珊
瑚鉤詩話四卷錄乜仙詩至十五六頁亦太近夷
堅諸志所記邊大綬伐李自成祖墓事甚詳然與
大綬自序不甚合疑傳聞異詞也

妙貫堂餘譚六卷

江西巡撫
採進本

國朝表若宏撰若宏字任遠新建人康熙丙子舉人
是書多記舊聞隨事論斷或意所未盡則本條之
下更綴餘論以申之凡分五類一日譚史二日譚

學三日譚詩文四日清譚五日雜譚記其鄉人之
事為多

東山草堂邇言六卷

戶部尚書王
際華家藏本

國朝邱嘉穗撰嘉穗有考定石經大學經傳解已著
錄是編乃其劄記之文分經史性命學問政教見
聞詩文六門大抵好為論辨而考據甚疎其有婦
人焉一條以婦字為媯字之譌指為陳胡公滿絕
無典據其古文韻語一條謂中庸仲尼祖述堯舜
一章為隔句用韻乃孔子贊如武字士字已見今

韻上聲七慶他如疇字悖字化字大字音皆相近
想古韻可通用惟如日月之代明明字乃平聲不
可假借或當叶作暮字其說乖謬託之夢中神授
尤為怪誕其三年喪辨一條謂古禮實三十六月
不知唐王元感已有此說為先儒所駁至謂此說
出魯詩世學係宋本今坊中無之是併豐坊不知
為何代人也哀梨一條謂哀字非姓非地殊不可
解當作袁字是併世說新語未考也至魚符一條
謂我

朝因前明之制凡朝參官給牙牌懸於腰間以通
禁門更為草野傳聞之語蓋其著書大旨在於講學
而又好奇嗜博雜及他事違才易務故踳駁如斯
至五卷見聞一門全類小說六卷詩文一門多論
八比尤與全書不類也

蓉槎蠡說十二卷

浙江孫仰曾家藏本

國朝程哲撰哲字聖跋歙縣人此編前有王士禎序
稱其抱博辨之才具論斷之識無雷同剽說之弊
然其書雜掇瑣聞不甚考證大抵皆才士聰明語

耳

道驛集四卷

浙江巡撫採進本

國朝張祖年撰祖年字申伯湯溪人是集其所自編凡再易刊版乃定卷一曰正學闡微泛論四書性理諸書卷二曰正史闡微大致似胡寅讀史管見卷三曰雜文提要卷四曰雜著提要大抵多講學之語祖年自稱張栻二十世孫故力辨張浚殺曲端事說論語孟子皆主栻說而於明英宗免聖賢後裔差役一事尤頌美不置云

讀書隨記一卷續記一卷剩語一卷

編修汪如藻家藏本

不著撰人名氏自題曰湖上逸人又署上章攝提格為庚寅歲相其版式蓋康熙中所刊也其書皆摘錄經史中語而以己意論斷之然無所發明剩語為詩賦小詞數十首於句下各加箋註亦無可採

卮壇對問六卷

江蘇巡撫採進本

國朝江德中撰德中有西粵對問已著錄是書首卷論支干及日月星雲之事二卷以下則雜論經史

其自序云斯編紀事初詳甲子譜年也間存姓氏
慎交也今覆審是書所載與二語絕不相應疑已
經他人刪訂非其原本矣

經史慧解六卷

浙江巡撫
採進本

國朝蔡含生撰含生字天度蕭山人其自署稱固陵
者即今蕭山縣西興地也是書雜取經史事蹟人
物各著論一篇凡二百二十有一其文縱橫辨難
頗似毛奇齡好為異說亦似之然博瞻不及也未
一篇論孟子謂孟子之徒如萬章公孫丑輩其言

鄙悖淺俚而惜已不遇孟子謂僕無從受孟子無
可授其為不遇則均其高自位置又甚於奇齡二
人生同邑里或亦聞風而興變本加厲歟

任菴語略

無卷數
直隸
總督採進本

國朝王建衡撰建衡有讀史辨惑已著錄是編乃其
筆記之文不分卷數但錄為上下二冊自述性喜
讀書儲藏甚富今觀其上冊所論皆商濬稗海所
載下冊所論皆陶宗儀說郛所載也

嶺西雜錄二卷

江西巡撫
採進本

國朝王孝詠撰孝詠字慧音吳縣人自序題疆圉大荒落之歲當為乾隆二年丁巳其時舊唐書猶未刊刻

頒行故孝詠有重刊之議也是書乃孝詠客遊廣西時作其中頗紀粵事而所考證議論無關於粵者甚多蓋以成於嶺西而名非記其風土也孝詠猶及與朱彝尊等游故耳目濡染所言往往有根柢其中如評李贄屠隆祝允明皆極確當其論徐炯註李商隱文集程嬰公孫杵臼事未詳左氏記趙

武事與史記全殊失之不考其欲以山海經老子莊子楚詞水經為十三經羽翼則文人好異之談又墮明人習氣矣

後海堂雜錄二卷

江蘇巡撫探進本

國朝王孝詠撰是書成於乾隆甲申年已七十五矣多評論古人亦閒及近事其學多本毛奇齡故欲以奇齡配孔子廟未免偏私其文人相輕一條載王士禎獎拔趙執信惟恐不及而執信薄行負心於其死後作談龍錄云云案執信為士禎之甥壻

其相失結釁在士禎生前故居易錄中論二馮批
才調集有鑄金呼佛之誚談龍錄序亦有年月可
稽孝詠以爲士禎沒後始著書非其實也

南村隨筆六卷

浙江巡撫
採進本

國朝陸廷燦撰廷燦有續茶經已著錄此其居家時
取平日所見聞雜錄之而於新城王士禎商邱宋
犖兩家說部採取尤多蓋廷燦爲士禎與犖之門
人故其議論皆本之池北偶談筠廊隨筆諸書而
略推擴之其中如辨古人之登高不獨重九開元

寺紙簫勝於磁簫諸條亦頗見新意至其載漢設
官七千五百餘員乃後漢之制不知前漢則其數
較倍推梁蕭子顯之同姓名錄不知子顯書世已
無傳考據亦時有未密也

枝譜二卷

浙江巡撫
採進本

國朝孫之騷撰之騷所輯尚書大傳已著錄是書取
花木蔬果之類各爲詮釋略於形色性味而詳於
名義或穿鑿其偏旁或附會其音聲偏旁音聲皆
不可通則宛轉假借牽合故實以寓議論大抵以

陸佃埤雅為鼻祖然埤雅之失在於好引字說而所長在於考據經典之駮不效其考據而效其字說亦可謂不善學矣古來著錄之例草木種植當附農家名物訓詁當附小學是書皆近之而皆不類姑附之於雜家焉

諤崖脞說五卷 浙江巡撫採進本

國朝章楹撰楹字柱天浙江新城人雍正癸丑進士官青田縣教諭是書皆其隨意鈔撮之語初名鹽捱脞說後更今名一卷曰詩話多錄同時諸人贈

荅詩篇而已作亦附見一二二卷曰昔遊乃述平生經歷山水佳勝三卷曰詫異則記近世異聞而閒證以古事四卷五卷曰撫軼則諸書紀載非世所習見者節錄大略而以已見發明之略似史論之體

書隱叢說十九卷 浙江巡撫採進本

國朝袁棟撰棟號漫恬吳江人是書雜鈔小說家言參以已之議論亦頗及當代見聞原序擬以洪邁容齋隨筆顧炎武日知錄棟自序亦云摹仿二書

然究非前人之比也

然疑錄六卷

江蘇巡撫
採進本

國朝顧奎光撰奎光有春秋隨筆已著錄是編乃其筆記之文其中說春秋者十之五六說四書者十之二三其他論史論詩論文及雜論事理者僅十之一二所徵引不甚博而立說大抵中理其論四書取毛奇齡之淹洽而不取其巧辨論春秋駁胡安國諸人之苛刻而一一原情準勢皆爲可取論嘉靖大禮一事歷駁張璁桂萼方獻夫之說而謂

楊廷和特操之已蹙遂相激彌甚可爲持平之議其論文論詩亦具有所見惟力駁公羊傳爲尊者諱之文則似持平而實乖理夫褒貶者是非之公義聖人不得私也忠孝者臣子之大分聖人亦不得越也董狐之於趙盾南史之於崔杼特同爲齊晉之臣耳若春秋則魯史孔子則魯人也其被弑之主若隱公閔公皆魯之先君其與弑之人若桓公宣公亦魯之先君也書薨而不地其實固不沒矣如儼然立其子孫之朝而奮筆大書以惡逆之

名加祖宗是豈天理之所宜而人情之所安哉奎
光所論是證父攘羊之直非聖人之義也

瀟湘聽雨錄八卷

編修程晉
芳家藏本

國朝江昱撰昱有尙書私學已著錄是編乃其弟官
常甯知縣時昱奉母就養因摭見聞考訂故實著
爲一編曰聽雨者取蘇軾兄弟對牀語也其中如
辨轄神祠卽軫宿旁之左轄右轄長沙翼軫分野
乃土人祀其分星又如引幽明錄證渣江爲查江
引玉篇北史及歐陽詢書溫彥博碑證案牘以準

作准非宋時院吏避寇準名其言頗有根據其辨
衡山响嘍碑一篇考究詳明知確出近時僞撰尤
足祛千古之惑惟調言瑣語頗傷泛濫不免失之
貪多耳

經史筆記

無卷數 兩江
總督採進本

國朝潘繼善撰繼善有音律節略考已著錄是書皆
偶拈經史之文爲之論說其論經如堯典月令中
星不同合朔置閏測算南陔無辭周禮闕冬官周
改時月論史如呂后喪心無恥不得耐於高祖孫

權呂蒙爲漢賊王守仁不說良知其所積自能有
用但其心中恍惚若有所見遂忘前此學問之力
而歸功於良知其立論亦頗準於理但皆人人所
共知耳

毛氏殘書三種

無卷數 江蘇
巡撫採進本

國朝毛羽宸撰原本不題書名亦無序跋目錄凡分
三部曰理學部多談心性曰儒學部多考證名物
典制曰史學部則史評也似全書不止於此此其
殘藁耳書中頗詆斥朱子如謂性與天道晦菴以

詞章晦之而晚更以與季通所言者與眾共言雖
欲使禪宗不寄我籬下不可得其說頗悖檢書中
有閱陶不退園集序說一篇甚推李贄知其學
所由來源流未正矣

樞園管測五卷

湖南巡撫
採進本

國朝王元復撰元復字能愚號醒齋里籍未詳是編
採永樂性理大全所列周子太極圖說邵子皇極
經世書朱子易學啟蒙蔡元定律呂新書蔡沈洪
範數諸書而引伸其說大抵因襲舊文而參以臆

斷所附天度月度及雜論數條亦皆掇拾性理之
緒餘其經書質疑中一條云童年夢人以書授余
內云惟臥龍無頃刻須臾之悔又云八月苦雨偶
看榴花落瓣於河圖之數有會是皆非篤實之言
也

數馬堂荅問二十卷

福建巡撫
採進本

國朝黃名甌撰名甌字馭卜福州人是書九類一天
文二地輿三人物四經書五史鑑六人事七釋老
八飛植九數學凡二百六十餘條而飛植類止一

條爲最少其體皆設爲問荅而大抵掇拾陳因時
多舛誤如牽牛織女一條曰問淮南子云七月七
夕織女會牛郎齊諧記謂天河東有織女天帝之
女因機杼勞苦天帝憐其獨居使嫁與河西牽牛
之夫嫁後廢女工天帝怒責令歸河東一年只會
一度事果可信歟云云考烏鵲填河以渡織女白
居易六帖引淮南子而淮南子無此文安得有七
月七夕之說吳均續齊諧記成武丁條下有織女
嫁牽牛五字何嘗有河東河西之語其勦撮無稽

大抵此類卷首引用書目二百四十種下至快書
藏書焚書綱鑑補唐類函閒情偶寄一家言唐詩
選歷朝捷錄五車韻瑞韻府羣玉古文析義性理
大全六才子書詩經嫿嫿之類皆據爲典要而二
十一史之外別有史記十三經之外別有五經三
傳孝經爾雅知其書由雜綴而成也

鈍根雜著四卷

編修周厚
轅家藏本

國朝周池撰池有讀史偶評已著錄是書卷一曰理
氣圖說明盈虛消息以漸而至窮極必返之義卷

二凡二篇一曰莊子身生性命子孫說因莊子知
北游篇之語而推廣之一曰損人利己說因史夔
願體集所論但言利害不言是非故以儒理正之
卷三曰諸凡視白七解詞則書一自字而闕其中
一橫畫因而推闡其說凡得七解自序謂如啞謎
隱語蓋遊戲之筆也卷四凡三篇一曰論詩經叶
韻有誤一曰卷耳篇辨解一曰邶風柏舟篇辨解
右雜家類雜說之屬一百六十八部一千一百零一
卷

內七部
無卷數皆附存目

欽定四庫全書總目卷一百二十九

番禺張兆榮初校
順德馮佐勛覆校

欽定四庫全書總目卷一百三十

子部四十

雜家類存目七

感應類從志一卷

浙江巡撫
採進本

舊本題晉張華撰隋唐以來經籍藝文諸志皆所
不載諸家書目亦不著錄書中語多俚陋且皆妖
妄魘制之法其為依託無疑也

物類相感志十八卷

浙江巡撫
採進本

舊本題東坡先生撰然蘇軾不聞有此書又題僧

贊甯編次按晁公武讀書志及鄭樵通志藝文略
皆載物類相感志十卷僧贊甯撰是書分十八卷
既不相符又贊甯爲宋初人軾爲熙甯元祐間人
豈有軾著此書而贊甯編次之理其爲不通坊賈
僞撰售欺審矣且書以物類相感爲名自應載琥
珀拾芥磁石引鍼之屬而分天地人鬼鳥獸草木
竹蟲魚寶器十二門隸事全似類書名實乖舛尤
微其妄也

物類相感志一卷

浙江巡撫
採進本

舊本題宋蘇軾撰凡分身體衣服飲食器用藥品
疾病文房果子蔬菜花竹禽魚雜著十二門共四
百四十八條皆療治及禁忌之事疑十八卷之本
卽因此本而衍之也

格物麤談二卷

編修程晉
芳家藏本

舊本亦題蘇軾撰分天時地理等二十門與世所
傳軾物類相感志大略相似後有元范梈識斷爲
後人假託他書亦罕見著錄惟曹溶收入學海類
編中蓋物類相感志已出僞作此更僞書之重儻

也

居家必用事類全集十卷

內府藏本

不著撰人名氏載歷代名賢格訓及居家日用事宜以十千分集體例頗為簡潔辛集中有大德五年吳郡徐元瑞吏學指南序聖朝字俱跳行又永樂大典屢引用之其為元人書無疑黃虞稷千頃堂書目云或謂熊宗立撰恐未必然也

多能鄙事十二卷

浙江汪啟淑家藏本

舊本題明劉基撰基有清類天文分野之書已著

錄是書凡飲食器用方藥農圃牧養陰陽占卜之法無不備載頗適於用然體近瑣碎若小兒四季關百日關之類俱見臚列殊失雅馴立名取孔子之言亦屬僭妄殆託名於基者也

都氏鐵網珊瑚二十卷

浙江范懋柱家天一閣藏本

明都穆撰穆有壬午功臣爵賞錄已著錄是書與世傳朱存理鐵網珊瑚同名案存理之書非存理始從世俗刊本稱之然存理之書分書品畫品二門備錄題跋印記為張丑郁逢慶諸書所宗是書則前四卷

次定回直金書總目卷一百三十一

子部 雜家類存目七

三

皆穆所為諸書序跋及書畫題跋卷五以下即穆所作寓意編蓋穆嘗以所見書畫別為一書此又以類相從附於書目之後然其中忽雜入書畫銘心錄乃何良俊所撰第七卷內鶴鵲一條又忽標爾雅二字之目皆不可解至第九卷雜錄研銘皆採自諸家文集非親見拓本第十卷以下則鈔偽本張掄紹興古器評十二卷以下則鈔湯垕畫鑒十五卷後半以下則鈔趙希鵠洞天清錄十八卷以下則鈔周密雲烟過眼錄皆非所自著益姦黠

書賈雜哀成編借穆之名以行也

水雲錄二卷 兩淮鹽政採進本

明楊溥撰溥長沙人自號水雲居士千頃堂書目列於劉基多能鄙事後即以爲永樂中石首楊溥然考書中自述有戎務之暇語則其人乃嘗爲武職者又所撰有用藥珍珠囊其書成於宏治中蓋名姓偶同非一人也是編上卷載十二月種植花果飲饌及文房雜用下卷分衛生養生器用牧養四門所記多農圃種畜法頗爲瑣屑

李氏居室記五卷

浙江范懋柱家天一閣藏本

明李濂撰濂有祥符先賢傳已著錄是編乃其退老居鄉築別墅於郊外有堂有亭各為撰記室中器物悉製箴銘以寓規警蓋林居放志之作故隨所欲言不以修詞為意云

便民圖纂十六卷

安徽巡撫採進本

不著撰人名氏第一卷為農務圖十五第二卷為女紅圖十六每圖皆係以竹枝詞一首第三卷以下分十一類曰耕穫曰桑蠶曰樹藝曰雜占日月

占曰祈禳曰涓吉曰起居曰調攝曰牧養曰製造嘉靖壬子刻於貴州前有左布政使李涵序稱鄜廷瑞始刻於吳中呂經又刻於滇省其中利民用者甚多然意求全備往往冗瑣如末卷載辟鬼魅法用桃枝灑雄黃水蓋據本草桃枝殺鬼雄黃殺精魅之說已為迂闊又有祛狐狸法云妖狸能變形惟千百年枯木能照之可尋得年久枯木擊之其形自見則據張華然華表照斑狸事衍為此法殆於兒戲矣其書本農家者流然旁及祈福擇日

及諸格言不名一家故附之雜家類焉

鼂采館清課二卷

兩江總督採進本

明費元祿撰元祿字學卿鉛山人鉛山之河口有五湖其一曰官湖即鼂采湖也元祿構館其上因以為名是書皆記其館中景物及游賞閒適之事

蕉窗九錄

無卷數江蘇巡撫採進本

舊本題明項元汴撰元汴字子京秀水人家藏書畫之富甲於天下今賞鑒家所稱項墨林者是也是書首紙錄次墨錄次筆錄次研錄次帖錄次書

錄次琴錄次香錄前有文彭序稱大半採自吳文定鑒古彙編閒有刪潤今考其書陋略殊甚彭序亦舛鄙不文二人皆萬萬不至此殆稍知字義之書賈以二人有博雅名依託之以炫俗也

考槃餘事四卷

通行本

明屠隆撰隆有篇海類編已著錄是書雜論文房清玩之事一卷言書版碑帖二卷評書畫琴紙三卷四卷則筆硯爐瓶以至一切器用服御之物皆詳載之列目頗為瑣碎其論明一代書家以祝允

明為第一而文徵明次之軒輊亦未盡平允

游具雅編一卷

編修程晉芳家藏本

明屠隆撰所載笠杖漁竿之屬皆便於遊覽之具故以為名卷末附圖四式一曰太極樽一曰葫蘆樽一曰山遊提盒一曰提爐雖書中所已具以其形製皆須圖乃明故復附繪於末

筠軒清祕錄三卷

兩淮鹽政採進本

舊本題董其昌撰其昌有學科考略已著錄是書凡列目二十有九皆論玉石銅磁諸古器及法書

名畫之類前有陳繼儒序謂可與項元汴薈林清課並稱今考其書即張應文所撰清祕藏但析二卷為三卷蓋應文之書近日始有鮑氏知不足齋刊版附其子丑真蹟日錄後從前鈔本流傳不甚顯著書賈以其昌名重故偽造繼儒之序以炫俗射利耳

墨林快事十二卷

兩淮馬裕家藏本

明安世鳳撰世鳳有燕居功課已著錄此書以所見古器古刻古書畫各為跋語凡六百九十五則

多涉議論頗乏考據之功

飛鳥語略一卷

編修程晉芳家藏本

明沈德符撰德符字虎臣又字景伯又字景倩秀水人萬歷戊午舉人此書論字墨法帖及古器真贋之別皆舉生平所聞見者凡十八條其中多與所著敝帚軒剩語相同疑即從剩語中鈔出者曹溶學海類編乃兩收之未免失於詳檢也

華夷花木鳥獸珍玩考十卷

浙江巡撫採進本

明慎懋官撰懋官字汝學湖州人是書凡花木考

六卷鳥獸考一卷珍玩考一卷續考二卷或剽取舊說或參以己語或標出典或不標出典真偽雜糅餽飭無緒如楓樹一條稱謨按云云似著此書者名謨又木蓮樹一條稱元和十四年夏命道士毋邱元志寫因題絕句云云似著此書者在唐代至衛懿公好鶴一條不引左傳而引傳奇俚詞尤為不考卷首自序一篇詞極夸大過矣

妮古錄四卷

通行本

明陳繼儒撰繼儒有邵康節外紀已著錄是書多

評論字畫古玩蓋倣趙希鵠洞天清錄周密雲煙
過眼錄而作然議論殊為淺陋

巖棲幽事一卷通行本

明陳繼儒撰所載皆山居瑣事如接花藝木以及
於焚香點茶之類詞意佻纖不出明季山人之習
自跋稱陳仲子為家於陵尤可嗤鄙此沿楊修家
子雲之誤也

博物要覽十六卷兩淮馬裕家藏本

明谷泰撰泰字甯字官蜀王府長史其書一卷紀

碑刻二卷紀書三卷紀畫四卷紀銅器五卷紀窯
器六卷紀硯七卷紀黃金八卷紀銀九卷紀珠十
卷紀寶石十一卷紀玉十二卷紀瑪瑙珊瑚十三
卷紀琥珀蜜蠟玻璃等物十四卷紀水晶玳瑁犀
角象等物十五卷紀香十六卷紀漆器奇石皆隨
所見聞摭錄成帙未能該備所論碑版書畫尤為
簡陋書成於天啟中而中有稱明太祖者殆後人
傳寫所改歟

廣社無卷數
內府藏本

明張雲龍撰雲龍字爾陽華亭人是書成於崇禎末年乃因陶邦彥所作燈謎而廣之前載作謎諸格取字義相似者配合一句暗射成語後借詩韻平仄分註以備採用然語多鈍置頗乏巧思

莖錄三卷

浙江范懋柱家天一閣藏本

不著撰人名氏卷首題鈔自袁陶齋亦不知陶齋何人也所載凡十一類文房通用至養育禽獸皆載其名義與一切新法大旨做多能鄙事諸書為之而瑣屑彌甚

研山齋珍玩集覽

無卷數 編修勵守謙家藏本

國朝孫炯撰炯字摯菴大興人吏部侍郎承澤之孫也是書取退谷隨筆中所論銅玉磁器及筆墨硯紙印章文玩與刻版繡繪刻絲之屬益以炯所見聞編成此帙炯自為序其中論刻版一條稱其家有宋版本草綱目四函考本草綱目乃明萬歷中李時珍所作安得有宋版也

老老恆言五卷

浙江巡撫採進本

國朝曹庭棟撰庭棟有易準已著錄是書皆言衰年

頤養之法前二卷詳晨昏動定之宜次二卷列居處備用之要末附粥譜一卷借為調養之需蓋庭

棟年七十五時作也

初學藝引二十三卷

浙江巡撫採進本

國朝李仕學撰仕學字亨敏號遜齋揭陽人是編本為初學游藝而作首冠以格言一卷其餘分六引日文引曰詩引曰書引曰畫引曰琴引曰棋引其文引凡五卷首論文次左傳選次莊子選次史記選次韓文選其詩引凡三卷首卷分論詩詩體詩

學三篇次卷選漢魏六朝唐詩末卷專論樂府分總論訂律審音宮調歌法題解諸目其書引凡四卷分論書書體書法書學等目畫引四卷亦如之其琴引四卷則做史記之例編為琴史首以古帝王始制琴及善琴者為十二本紀而孔子與焉又表古今人物及七絃十二徽與手勢指法等為十表又撰禮書樂書天官書定制書擇材書操縵書正音書為八書其二十世家則能以琴世其家者其七十列傳則古今善琴之人也編末棋引二卷

則自出新意取邵子之易數以爲棋局其凡例謂以堯夫爲弈秋四大爲枰分野爲郢日月爲子晦明爲黑白嬪遞升降爲劫數輸贏名曰棋局新書示與舊譜不同也其書分八目一曰說局總說大意二曰先天成局卽邵子之日月星辰水火土石也三曰方圓正局卽先天方圓二圖合而圖之象天包地外地處天中也四曰奇偶變局卽日月星辰水火土石八卦八而重之爲六十四卦六而變之爲三百八十四卦也五曰得數定算則以元會

運世歲月日時爲經而以十二三十之數反覆相乘也六曰爛柯甲子蓋一元十二會全圖也七曰長安舊聞則自己會第三十運至午會第十一運之圖蓋邵子嘗推數起唐堯甲辰迄宋之熙甯仕學此書復增而益之至於

本朝也八曰棋閣測議蓋引黃氏管窺之說以總古今全局也其名書之意不過以一元有三百六十運一會有三百六十世推之年月日時其三百六十之數皆與棋合故以棋局名焉其亦妄作聰明

弊精神於無用之地矣

右雜家類雜品之屬二十六部一百七十二卷

內三部無

卷數皆附存目

欽定四庫全書總目卷一百三十

番禺張兆榮初校
順德馮佐助覆校

欽定四庫全書總目卷一百三十一

子部四十一

雜家類存目八

帝皇龜鑑二十四卷

兩淮馬裕家藏本

舊本題宋王欽若撰欽若事蹟具宋史本傳是書

考宋以來史志書目皆不著錄詳檢其文即冊府

元龜中帝王一部卷首欽若序即原書之總類也

偽妄剽竊之書本不足辨而既有傳本恐滋疑誤

是以存而論之焉

微言一卷

浙江范懋柱家天一閣藏本

宋司馬光編光手鈔諸子史集精語置諸座右以自警自題其首云迂叟年六十八蓋元祐初為相時也後有陳振孫跋載光自題其末云余此書類舉人鈔書然舉子所鈔獵其辭余所鈔覈其意舉人志科名余志道德今是編已失其題末未知陳氏所載為全文否又陳氏稱自國語以下六書今惟國語家語韓詩外傳孟子荀子五書疑有佚闕又每條下間有題識數字者卷末又列所欲取書

名二十二種蓋未完之槁後人以光手書重之耳

臥遊錄一卷

江蘇巡撫採進本

舊本題宋呂祖謙撰祖謙有古周易已著錄是書前有嘉定九年王深源序後有嘉靖壬午顧元慶跋凡四十五則前二十一則全錄劉義慶世說新語次十八則全錄蘇軾雜著及陶潛集惟後二則不知為誰語其言參差不倫了無取義祖謙必不如是之陋此本出陳繼儒普祕笈中殆明人依託也

欽定四庫全書總目卷一百三十一
經子法語二十四卷

浙江巡撫
採進本

宋洪邁撰邁有史記法語已著錄邁兄弟竝以詞科起家此書蓋卽摘經子新穎字句以備程試之用者凡易一卷書二卷詩三卷周禮二卷禮記四卷儀禮公羊傳穀梁傳孟子荀子列子國語太元經各一卷莊子四卷體例略如類書但不分門目與經義絕不相涉朱彝尊以易法語一卷詩法語一卷之類散入經義考各門之中題曰未見未免失考矣

文苑英華鈔四卷

浙江巡撫
採進本

宋高似孫編似孫有剡錄已著錄是編乃採摛文苑英華中典雅字句可供文章之用者仿洪邁經子法語之例鈔合成帙刻本仍以原目爲次不分卷數以似孫原序考之當時實分四卷也其中以諸本參校如呂令開蓮峯賦別本皆作氣開秋爽此本作氣涵秋爽賈至早朝詩別本皆作共沐恩波鳳池上朝朝染翰侍君王此本作共沐恩波鳳池裏終朝默默侍君王李羣玉黃陵廟詩別本皆

作迴風日暮吹芳芷此本作東風日暮吹香芷皆
小有異同韓愈汴州東西水門記別本俱作請紀
成績此本作皆請紀其成績又遂極其危句此本
作遂持危亦皆韓集舉正韓文考異所未載其搜
羅亦頗該洽自序謂周必大奉敕校文苑英華是
書有助焉然摘錄不具首尾僅為詞科餽訂之學
爾

養生雜纂二十二卷附月覽二卷

兩淮鹽政
採進本

宋周守忠撰守忠號察菴

案察古
文松字

不知何許人初

以養生宜忌之事按月編錄名曰月覽後於嘉定
壬午又廣為雜纂首為總敘三篇次以事類分為
十三部後人以月覽附刻於後共為一書總題曰
養生雜類非其本名也

石屏新語二卷

浙江吳玉
暉家藏本

舊題宋戴復古撰復古字式之天台黃巖人居南
塘石屏山因以自號是編以石屏新語為名則當
為復古所手著乃編中惟錄張詢古五代新說陳
郁藏一話腴二種而多所刪節當是後人依託其

名鈔撮成帙也

補妬記八卷

浙江鄭大節家藏本

舊本題曰京兆王績編不著時代案晁公武讀書志載有此書一卷謂不知何人所輯陳振孫書錄解題亦有此書稱王績撰因古有宋虞之妬記今不傳故補之其題名與此相合當即振孫所見之本其書自一卷至六卷紀商周迄五季妬婦之事第七卷曰雜妬謂淫亂而妬及事涉神怪者第八卷曰總敘乃雜說文章自涼張續妬婦賦以下竝

闕故振孫所稱治妬二方已無之然振孫既云古妬記不傳而書中又有採自妬記者不知何據殆於類書剽取之至第七卷內宋仁宗尙楊二美人事乃註云見宋史則明人已有所附益非復宋代原書矣

古今藝苑談槩上集六卷下集六卷

兩江總督採進本

舊本題俞文豹撰案文豹宋人所著吹劔錄外集已著錄此編多引明代諸書蓋偽託也書中雜採故實無所辨論每條下各列書名而疎舛特甚如

鄒忌妻妾事出戰國策而註曰十二國春秋列子攫金於市事未增吏大笑之四字當為無知書賈鈔撮說部偽立新名也

澄懷錄二卷

兩淮鹽政採進本

宋周密撰密有志雅堂雜鈔已著錄是書採唐宋諸人所紀登涉之勝與曠達之語彙為一編皆節載原文而註書名其下亦世說新語之流別而稍變其體例者也明人喜摘錄清談目為小品濫觴所自蓋在此書矣

女教書四卷

永樂大典本

元許熙載撰熙載字獻臣彰德相州人參知政事有壬之父也是編集經書及先儒之言凡有關於女教者分為六篇曰內訓曰昏禮曰婦道曰母儀曰孝行曰貞節

景行錄一卷

浙江范懋柱家天一閣藏本

舊本題元史弼編弼字君佐自號紫微老人博野人官至福建行省平章政事封鄂國公事蹟具元史本傳是編成於至元丁亥所錄格言百餘條多

金房口庫全書目錄卷二十三
剽綴省心錄之語前有弼自序其詞潦倒可笑似
出妄人所依託復有明瞿佑序稱宣德戊申侍太
師英國公坐因問經史中警句可資觀覽而切於
修省者謹寫一編拜獻以供清暇之一顧末題門
下士瞿佑手錄時年八十有二詞亦庸劣佑似不
應至此考成化丙戌木訥作佑歸田詩話序雖有
太師英國張公延為西賓之語然佑自序作於洪
熙乙巳稱老與農圃為徒亦竊歸田之號又稱輟
耕隴上箕踞桑陰則洪熙時已返江南矣安得宣

德戊申尚作客張輔家哉其為假名於佑尤顯然
矣後又有正德乙亥鎮遠侯顧士隆重刊序嘉靖
甲午衡王重刊序蓋皆因仍偽本不及考核耳

有官龜鑑十九卷

永樂大典本

元蘇霖撰霖有書法鉤元已著錄是編採前人服
官事蹟彙為一書凡分四十類皆以四字標題如
輔相君王贊翼皇儲之類頗涉於俗且既有陳善
閉邪又有繩愆糾謬直言極諫之類亦病於複體
例殊為猥雜所引諸書惟有元諸人言行採自家

傳墓誌者間爲他書所未載其餘經史子集皆人所習見論斷尤罕所發明殊無可採也

忍經一卷

永樂大典本

元吳亮撰亮字明卿錢塘人前有馮寅序稱吳君精於經術吏事至元癸巳解海運元幕之任恬淡自居於纂述歷代帝王世系之暇思其平生行已惟一忍字會集羣書中格言大訓以爲一編所採皆習見之書蓋姑以見意云爾

閒博錄一卷

浙江巡撫採進本

不著撰人名氏諸家書目亦不著錄大都述先正格言及達觀保生之事卷中有一條稱吾鄉沈持要詹事今年已八十有三耳目聰明云云持要乃沈樞之字樞德清人則此書似當爲宋南渡後湖州人所撰然書末復有二條一稱皇朝修經世大典云云一稱聖朝郊祀祝文天子以下止右丞相得預名云云經世大典成於元文宗至順二年據元史百官志專任右丞相亦自至順元年始則此書之成又當在至順以後矣觀卷中採摘舊事往

往直錄原文沈持要一條疑亦從他書鈔撮未及
改正其實乃元末人所作也

女紅餘志二卷

浙江巡撫
探進本

舊本題龍輔撰據原序所稱乃武康常陽之妻序
不題年月不知何許人也上卷皆採掇新豔字句
陽序稱外父為蘭陵守元度公後家多異書細君
女紅中饋之暇輒閱之擇其當意者編成四十卷
屬余游宦京師細君精差其最佳者手錄之僅四
十之一云云然皆不著出典又無一語為諸書所

經見殆雲仙散錄之流下卷皆輔所作小詩亦淺
弱不足採錄錢希言戲垵稱為好事者所依託則
明人已灼知其偽毛晉乃刻之詩詞雜俎中失考
甚矣

誠齋雜記二卷

內府
藏本

舊本題元林坤撰前有永嘉周達卿序稱坤字載
卿會稽人曾官翰林所著書凡十二種此乃其一
誠齋坤所自號也作序年月題丙戌嘉平不署紀
元書中引聶碧窻詩與古人竝列聶為元初道士

則是書在後矣中皆剽掇各家小說餽釘割裂而不著出典如崑崙奴磨勒一事分於五處載之其舛陋可知也

瑯嬛記三卷

兩江總督探進本

舊本題元伊世珍撰語皆荒誕猥瑣書首載張華為建安從事遇仙人引至石室多奇書問其地曰瑯嬛福地也註出元觀手鈔其命名之義蓋取乎此然元觀手鈔竟亦不知為何書其餘所引書名大抵真偽相雜蓋亦雲仙散錄之類錢希言戲瑕

以為明桑懌所偽託其必有所據矣

勸善書二十卷

永樂大典本

明仁孝皇后撰書成於永樂三年其所採輯兼及三教蓋意主勸戒下愚不及所作內訓之純粹也

臣鑒三十七卷

內府藏本

明宣宗皇帝撰有宣德元年四月御製序取春秋迄金元人臣事蹟分善可為法惡可為戒二類而宋之張俊亦在善可為法類品第似未盡允也

外戚事鑒二卷

浙江范懋柱家天一閣藏本

不著撰人名氏千頃堂書目有明宣宗御製外戚
事鑒五卷於漢以下歷代戚里之臣舉其善惡之
迹併其終所得吉凶類而列之得七十九人宣德
元年四月書成皇親各賜一本此本所載大略相
符然所列止五十六人而書亦祇二卷殆後人有
所竄改合併非其原書矣

君鑒五十卷

內府
藏本

明景皇帝撰景泰四年成書有御製序亦分善可
爲法惡可爲戒二類與宣宗臣鑒相同而自二十

九卷及三十五卷皆紀明祖宗之事則用范祖禹
帝學例也

昭鑒錄十一卷

浙江范懋柱家
天一閣藏本

明洪武初奉敕撰案千頃堂書目曰太祖嘗命禮
部尙書陶凱等採錄漢唐以下藩王善惡以爲鑒
戒編輯未竟復詔秦王傅文原吉翰林編修王傑
國子博士李叔元助教朱復錄事蔣子杰等續修
之洪武六年書成太子贊善宋濂爲序卽此編也
然虞稷稱其書五卷又稱一作二卷此本十一卷

而善可為法止於元其後又有先善後惡一門而惡可為戒僅止於宋似尙闕一卷不知虞稷何以云然也

永鑑錄二卷

永樂大典本

明洪武中奉敕撰凡分六目一日篤親親之義一日失親親之義訓朝廷也一日善可為法一日惡可為戒一日立功國家一日被姦陷害訓諸王也每條各舉古事而以俗語演之取其易通曉也

歷代駙馬錄二卷

永樂大典本

明洪武中奉敕撰其書取自漢至宋尙主之人各敘其善惡事蹟以示法戒亦演以俗語

公子書三卷

永樂大典本

明洪武中能鼎等奉敕撰採摭古事分為三類一良臣門一忠臣門一姦臣門其詞較永鑑錄尤俚淺蓋以訓開國武臣之子弟故務取通俗云

帝王寶範三卷

永樂大典本

明馬順孫撰順孫江南人洪武中布衣是書雜採經史分類編輯其目二十有三當太祖開創之初

嘗進於朝冀採以定制作興禮樂然擇焉不精語焉不詳徒爲老生之常談而已千頃堂書目載此書作六十卷今考永樂大典所載實止三卷雖編錄時或有合併不應懸絕至此殆黃虞稷未見原書也

使規一卷

浙江汪啟淑家藏本

明張洪撰永樂四年洪以行人司行人奉使往諭緬甸著有南夷書已著錄此書亦是時所作採古人奉使事迹勒爲一編分十有六類曰忠信曰節

義曰廉介曰謙德曰博古曰文學曰識量曰智慮曰威儀曰說辭曰舉賢曰咨訪曰服善曰詳慎曰勇略曰警戒各列事實於前而斷以己意末爲使緬附錄紀當日往返情形竝載所與緬酋書六篇

景仰撮書一卷

江蘇巡撫採進本

明王達撰達有筆疇已著錄是書一名尙論篇取古人可爲師法者凡五十二事皆前列舊文後系以論率膚淺無意義又出筆疇之下矣

學範二卷

浙江巡撫採進本

欽定四庫全書總目卷一百三十一

子部 雜家類存目八

七

明趙搆謙撰搆謙有六書本義已著錄是書分六門一曰教範言訓導子弟之法二曰讀範列所應讀之書三曰點範皆批點經書凡例四曰作範論作文五曰書範論筆法六曰雜範論琴硯鼎彝字畫印章之類搆謙頗以小學名而此書所述至爲弁陋雜範一門尤爲不倫蓋家塾訓蒙之式用以私課子弟耳懸以爲學者定範則謬矣

綱常懿範十卷

江西巡撫探進本

明周是修撰是修初名德以字行泰和人洪武中

舉明經由霍邱訓導改衡府紀善燕王兵入死之事蹟具明史本傳乾隆四十一年

賜諡節愍是編前有自序稱因閒居感其母彭氏教以忠孝大端因採輯前言往行凡十六門曰明王良相名將循吏忠烈純孝女德友悌交契儒宗才傑世昌清隱聯芳德報同居通一千三百九十有六條解縉作是修墓誌楊士奇作是修傳亦皆稱其嘗撰是書與此本合史稱其嘗輯古今忠節事爲觀感錄與此不同或一書而二名歟案是修授命

成仁爭光日月作此書以培植綱常行不愧言尤足以風動百世自宜錄之以傳久遠然核其所述大抵荒陋舛鄙類鄙塾野老稍知字義者所為殊不似是修之筆殆原書久佚而其後人贗補之如張九齡千秋金鑑錄類也故今惟錄其文集而是書則附存目焉

為善陰騭十卷

內府藏本

明永樂十三年官撰頒行前有成祖自製序所採共百六十五條各以四字標題加之論斷并系以

詩

政訓二卷

兩江總督採進本

明彭韶編韶字鳳儀莆田人天順丁丑進士官至刑部尚書諡惠安事蹟具明史本傳是編凡文公政訓一卷皆採掇朱子語類中論政之語西山政訓則真德秀西山集中所載帥長沙及知泉州日告諭官僚之文也西山政訓之未舊附心政二經見張悅序中此本乃陳繼儒刻八寶顏堂祕笈者因心政二經有別本自行故所存僅此二卷云

聞見類纂小史十四卷 浙江范懋柱家天一閣藏本

明魏僞撰僞字達卿鄞縣人官石城縣訓導是書內篇十七皆記人倫文行之足為世法者外篇七記神鬼外國諸事續篇一皆雜說篇各有序有論大抵據所見聞載之雖採摭頗繁而多傷於俚

食色紳言二卷 兩江總督採進本

舊本題明皆春居士撰不著名氏考明本瀛奎律髓有成化丁亥新安守龍遵敘自稱皆春居士疑即遵作也其書凡飲食紳言一卷勉人戒殺男女

紳言一卷勉人節慾皆摭取前人成語及佛經道藏諸書

奚囊手鏡十三卷 安徽巡撫採進本

明楊循吉撰循吉有蘇州府纂修識異已著錄循吉好蓄異書聞有祕本必購求繕寫是編蒼粹諸類書頗稱博瞻而門目未分茫無體例劉鳳王世貞曾分得其彙後遂散佚明史藝文志作二十卷此止十三卷不知為鳳家之半部抑世貞家之半部也

諸子纂要八卷

內府藏本

明黎堯卿編堯卿忠州人宏治癸丑進士其書雜鈔諸子之文以備科舉之用仿高棟唐詩品彙例分正宗接武餘響之類尤為效顰棟之品詩論者已多異議況以其例品諸子乎

儼山外紀一卷

編修程晉芳家藏本

舊本題明陸深撰深有南巡日錄已著錄此書載學海類編中乃曹溶於深儼山堂外集之中隨意摘錄數十條改題此名非深自著之書也

續觀感錄六卷

浙江巡撫採進本

明方鵬撰鵬有崑山人物志已著錄自序謂明初周是修嘗作觀感錄紀古今孝義之事其書不傳因復為此以續之凡事蹟顯著者不錄其人微而事隱非世所恆見者則錄之欲使愚夫愚婦皆知觀感而興起焉然僅據所見摘錄故搜羅未為該博云

物異考一卷

兩江總督採進本

明方鳳撰鳳有方改亭奏草已著錄是書載水異

欽定四庫全書總目卷一百三十一

子部 雜家類存目八

十七

火異皆異木異金石異人異蟲異凡七條歷代災
異見於正史雜史者不可勝紀鳳於每條舉二三
事真所謂挂一漏萬矣

禱雨錄一卷

兩江總督
採進本

明錢琦撰琦有錢子測語已著錄是書因嘉靖乙
巳歲旱乃輯錄古來修德致雨之事以告守土之
官意在規諷其持論未為不正然自桑林之禱至
馬璘之撤土龍皆歸本人事而自鬱林石牛以下
乃徵引小說侈談神怪蕩然全失其本旨非惟白

亂其例實亦自穢其書矣

欣賞編

無卷數 浙江
巡撫採進本

不著撰人名氏徐中行序但稱沈潤卿以千頃堂
書目考之乃沈津所編潤卿其字也所著鄧尉山
志已著錄序中所云茅子康伯續者亦不著其名
卷中有茅一相補閱字蓋即其人矣序稱書十卷
然實止八冊不分卷數序稱始於詩法終於修真
而書中詩品詞評乃在第三冊九顛舛無緒所載
書出陶宗儀說郭者十之八九皆移易其名其說

郭所無一二種亦皆妄增姓氏別立標目非其本書至於改竄屠隆碑帖考尤多舛戾說郭一百卷名見孫作所撰陶宗儀傳世所行本已非其舊此更剽竊而變亂之風益下矣

諸子品節五十卷

通行本

明陳深編深有周禮訓雋已著錄是書雜鈔諸子分內品外品小品內品為老子莊子荀子商子鬼谷子管子韓子墨子外品為晏子子華子孔叢子尹文子文子桓子關尹子列子屈原司馬相如揚

子呂覽孫子尉繚子陸賈新語賈誼新書淮南子小品為說苑論衡中論又以桓譚陳時政疏崔寔政論班彪王命論竇融奉光武及責隗囂二書賈誼弔屈原賦司馬相如揚雄諸賦及喻巴蜀檄難蜀父老劇秦美新諸文錯列其中尤為龐雜蓋書肆陋本也

翼學編十三卷

內府藏本

明朱應奎撰應奎字麗明廣漢人考太學進士題名碑嘉靖辛丑科有朱應奎錦衣衛籍不知即其

人否也其書以大學格致誠正修齊治平分類而
雜載碎事名實殊為乖迂如格致類所載花九錫
四香閣之屬猥瑣至極而謂足翼大學乎

談資三卷

兩江總督
採進本

明秦鳴雷撰鳴雷字子豫臨海人嘉靖甲辰進士
第一官至南京吏部尙書其書採錄古事不分門
類亦不次時代不註出典龐雜參錯莫喻其去取
之意如齊王木履一事乃蘇軾艾子之戲言亦據
為實事錄之其無所別擇可知矣

廣仁類編四卷

江西巡撫
採進本

明王時槐撰時槐字子植號塘南安福人嘉靖丁
未進士官至太僕寺少卿出為陝西布政使參政
中察典罷歸後起為太常寺卿不赴卒於家事蹟
具明史儒林傳是書分篤倫德政惠濟活物四類
各摭故實配隸之時亦及因果報應之說蓋神道
設教以勸喻顓蒙故不盡為儒者之言也

學圃憲蘇六卷

浙江朱彝尊家
曝書亭藏本

明陳耀文編耀文有經典稽疑已著錄是編雜錄

欽定四庫全書總目卷一百三十一

子部 雜家類存目八

二十

諸書新異之語不立門目亦無所考訂蓋隨閱隨鈔自備談資而已初耀文官陝西時纂此書以署後亭有雙檜題曰檜林雜誌歸里後補輯成帙取蕙草忘憂皋蘇釋勞之義改題此名云

初潭集十二卷

內府藏本

明李贄撰贄有九正易因已著錄此乃所集說部分類凡五曰夫婦曰父子曰兄弟曰君臣曰朋友每類之中又各有子目皆雜採古人事蹟加以評語其名曰初潭者言落髮龍潭時卽纂此書故以

爲名大抵主儒釋合一之說狂誕謬戾雖粗識字義者皆知其妄而明季乃盛行其書當時人心風俗之敗壞亦大概可睹矣

讀升菴集二十卷

副都御史黃登賢家藏本

明李贄編是編哀集楊慎諸書分類編次凡採錄詩文三卷節錄十七卷去取毫無義例且贄爲狂縱之禪徒慎則博洽之文士道不相同亦未必爲之編輯序文淺陋尤不類贄筆殆萬歷閒贄名正盛之時坊人假以射利者耳

續自警編八卷

兩江總督採進本

明黃希憲撰希憲字毅所金谿人嘉靖癸丑進士官至應天巡撫是書續宋趙善瑋自警編而作雜採自宋至明格言善事分類記載然編次叢脞綱目混淆目列十六卷而書止八卷檢其所載門目又一一無差至以修身修己分爲二門又以考正祀典考復古禮入之將帥門中而未一卷乃全錄山林放曠之詞非復儒者修省語尤爲龐雜

牧鑑十卷

浙江巡撫採進本

明楊昱撰昱字子晦別號東谿汀州人是書以經史百家之言有關政治者裒輯成帙爲類凡四曰治本治體應事接人類各有目凡三十有五目又各分上中下上述經傳中紀古人政蹟下摭儒先議論每類首綴小序一篇其餘別無論斷嘉靖乙卯汀州府同知李仲俱序而刊之所徵引甚略大抵隨意摭拾無關體要意其爲書帕本也

芸心識餘七卷續一卷

兩淮鹽政採進本

明陳其力撰其力字克相號芸心子通海人官南

欽定四庫全書

子部 雜家類存目八

三

京戶部司務其書成於嘉靖辛酉凡禽鳥獸畜龍蛇蟲鼠魚鼈五部分門隸事每事標題於前雜列故實而附以論斷龐雜割裂殊無可觀持論尤多猥鄙觀所列引用書目以明道集讀書錄列之經傳以爾雅與真仙寶誥同列之圖註以說文續文章正宗八之類書甚至漢書之外又有漢史開元遺事之外又有天寶遺事如斯之類指不勝屈殆不足與辨

煙霞小說二十二卷

江蘇巡撫採進本

明陸貽孫編貽孫蘇州人是書仿曾慥類說之例刪取稗官雜記凡十二種中如楊循吉吳中故語黃暉篷軒記馬愈日鈔杜瓊紀善錄王凝齋名臣錄陸廷枝說聽六種逸事瑣聞尙資考論至陸粲庚己編徐禎卿異林祝允明語怪編猥談楊儀異纂陸灼艾子後語六種則神怪不經之事矣

閱古隨筆續二卷

江蘇周厚堦家藏本

明穆文熙撰文熙有七雄策纂已著錄是編雜採諸子之文而又不著其所出惟卷首總列其所採

欽定四庫全書

子部 雜家類存目八

三三

書目體例殊謬所錄亦皆習見首頁題正續閱古
隨筆而書中題閱古隨筆續蓋尙有正集今未之
見

諸子彙函二十六卷

內府藏本

舊本題明歸有光編有光有易經淵旨已著錄是
編以自周至明子書每人採錄數條多有本非子
書而摘錄他書數語稱以子書者且改易名目詭
怪不經如屈原謂之玉虛子宋玉謂之鹿谿子江
乙謂之賢鷺子魯仲連謂之三柱子淳于髡謂之

波弄子孔求謂之子家子張孟談謂之歲寒子頓
弱謂之首山子甘羅謂之潼山子貌辨謂之雲幌
子陸賈謂之雲陽子賈誼謂之金門子董仲舒謂
之桂巖子韓嬰謂之封龍子東方朔謂之吉雲子
劉向謂之青藜子崔寔謂之渣呀子桓譚謂之荆
山子王充謂之委宛子黃憲謂之慎陽子仲長統
謂之鬢山子王符謂之回中子桓寬謂之貞山子
曹植謂之鏡機子束皙謂之白雲子嵇康謂之靈
源子劉勰謂之雲門子陸機謂之于山子劉晝謂

之石匏子李翱謂之協律子羅隱謂之靈孛子石介謂之長春子皆荒唐鄙誕莫可究詰有光亦何至於也是也

困學纂言六卷

浙江巡撫採進本

明李栻撰栻字孟敬豐城人嘉靖乙丑進士官至浙江按察司副使是編乃隆慶庚午栻爲肥鄉知縣時所刊分十二門曰學問曰立志曰存心曰精思曰實踐曰謹言曰敬事曰求師曰取友曰讀書曰作文曰舉業皆採摭古人議論近於講學者分

類次敘然講學及於作文抑已末矣作文之外又別立舉業一門其說尤未免於雜也

灼艾集八卷

浙江巡撫採進本

不著撰人名氏書前亦無序例據高儒百川書志云九沙山人萬表灼艾時所集也表有海寇議已著錄是編凡分正續餘別四集每集各分上下卷採輯唐宋以來說部每書祇載一二條或四五條略似曾慥類說而詳博則不及之也

百家類纂四十卷

內府藏本

明沈津編案明有兩沈津其正德中作鄧尉山志及欣賞編者乃蘇州人此沈津慈谿人嘉靖中官含山縣教諭是書所錄自周秦諸子下逮於明殊爲冗濫同時尙書張時徹所作說林亦與焉殆未聞昭明文選不錄何遜之義也

警心類編四卷

江蘇巡撫採進本

明張位撰位有問奇集已著錄是書乃其罷相後所輯故多老氏謙退之旨佛氏因果之談

天池祕集十二卷

直隸總督採進本

舊本題明徐渭編武林孫一觀校案渭嘉靖中人
有筆元要旨已著錄是編所載如葉向高陳繼儒之類皆在其後渭安得見其詩文蓋卽一觀所輯
僞託於渭也其書體例駁雜標目詭異前六卷爲
總集一曰韻萃諸體詩也二曰調雋詞也三曰籟
叶樂府歌行也四曰麗華賦也五曰筆華雜文也
六曰志林傳也後六卷爲小說一曰談芬清言也
二曰曠述雜事也三曰諧史詼嘲語也四曰別紀
誌怪也五曰致品分良辰美景賞心樂事四子目

六曰清則分花典香禪茗談觴政四子目皆明季
山人強作雅態之語四庫之中無類可入以其雜
出不倫附之雜家類焉

六鑑舉要六卷

江西巡撫
採進本

明劉元卿撰元卿有大象觀已著錄是編成於萬
歷丙午取帝鑑相鑑言鑑牧鑑瑞鑑閨鑑六書各撮
取其文合爲一帙漏略殊甚不足以言著作

古今名賢說海二十二卷

直隸總督
採進本

不著編輯者名氏前有隆慶辛未自序一首題曰

飛來山人所錄皆明人說部分爲十集以十千標
目自陸粲庚已編以下凡二十二種種各一卷皆
刪節之本非其完書考明陸楫有古今說海一百
四十二卷此似得其殘闕之板僞刻序目以售欺
者也

名賢彙語二十卷

浙江巡撫
採進本

不著編輯者名氏前亦有隆慶辛未自序亦稱飛
來山人序詞鄙陋疑爲坊賈之筆其書節錄明人
小說二十種種爲一卷皆題曰某地某人言尤爲

杜撰殆又從古今名賢說海而變幻之耳

歷代小史一百五卷 內府藏本

不著編輯者名氏首有沔陽陳文燭序稱侍御李

公所集而中丞趙公刻之皆不著其名字里籍不

知為何許人也其書蓋欲仿曾慥類說之例雜採

野史每書刪存數條凡一百五種以一種為一卷

中間時代顛倒漫無端緒蓋當時書帕之本以校

刊付之吏胥者也

欽定四庫全書總目卷一百三十一

番禺張兆榮初校
順德馮佐崱覆校

十
二